

Emilia Beer-Koller, Tschamut

GR 13.1.87



(Sd) Il giavisch dalla defuncta Emilia Beer da saver sparter da quest mund in di da fiasta ei vengnius exaudius. Suenter in temps da maldispostadad ha ella surdaus sia olma al Tutpus-sent la damaun

dalla fiasta da Nadal. Ella ei morta ruasseivlamein e bein preparada pil viadi ella patria celestia. L'annunzia da mort entscheiva culs plaids: «Ti has fideivlamein luvrau, per tut ils tes giu bien quita. Dieus vegli tei remunerar, pagaglia celestia dar. «Quei ei il giavisch dils affons, fargliuns e da nus tuts, che havein enconuschiu la cara defuncta.

Provegnentscha e clamada

Emilia ei naschida ils 27 d'avrel 1903 ad Appenzell sco otgavel affon dalla famiglia Koller-Grubenmann. Il bab fuva in enconuschent pictur. Ensemen cun ils 20 fargliuns ha la giuvna Mily, sco ella vegneva numnada, stuiu emprender da luvrar e sedustar da pign ensi. Ils «Kollers» havevan retschiert en tgina duns tut aparti; els fu van empau artists (picturs e musicians) e surtut luvrus e honzelis. Aschia ha mintgin anflau la via ad ina undreivla existenza. Anno 1929 acquista il bab Koller ad Appenzell il restaurant Gambrinus e la feglia Mily vegn destinada sco cameriera e guvernanta da quella fatschenta. Cun temperament,

cun sia curtesia e survetscheivladad viers giuven e vegli, signur e sempel luvrer gudogna ella en cuort temps la simpatia dils hospes. E tuttina cape-scha ella da tener la duida distanza sco ei descha ad ina cameriera.

In hosp para da haver speciala preferenza tier la biala giuvna dil Gambri-nus. Igl ei quei il cuschinier dil hotel Hecht, Benedetg Beer, in Grischun da num e pum. Quei um ruasseeivel e pli-tost retratg plai a Mily. Suenter enza-cons onns da practica el Casino a S. Gagl e suenter seriusa e madira ponderaziun sedecidan els igl onn 1940 da festivar lur nozzas ed entrar en stan da lètg.

A Tschamut

Ils 28 da matg 1941 serendan ils dus consorts a Tschamut e suprendan - entras cumpra - il hotel «Rheinquelle». Il cumbat d'existenza leusi ella emprema casa d'albiert al pei dalla tgina dil Rein ei grevs. Onns d'uiara e pupira ed in hotel empau en decadenza senza igl inventari neces-sari dattan da lignar. Dunna Emilia Beer - ensemens cun siu consort Benedetg - piardon búca la curascha e damognan la situaziun. Grazia alla expe-rienza sco hoteliera, alla cordialitat e survetscheivladad - ed oravontut muort alla excellenta cushima - vegn la «Rheinquelle» gleiti enconuschenta lunsch entuorn. Dunna Beer s'integrescha ualit spert ellas relaziuns muntagnardas, tschontscha - suenter paucs onns - currentamein ro-montsch e pren viva art e part dil far e demanar e dils quitaus dils avdonts el vitget a Tschamut. La mumma ha tut

aparti quita per l'educaziun ed instrucziun da ses 5 affons (1 buob e qua-ter buobas). Tier tut la truscha en casa s'empatscha ella era dils vischins en miseria. Ils Beers gidan e segidan da-pertut nua ch'ei fa basegns. Duront las tschaveras ei la tablada savens occu-pada cun in diember che survarga la atgna famiglia.

Ensemens cun siu consort Benedetg e cun sia famiglia ha dunna Beer varga 30 onns bien quita dil pign sanctuari da s. Clau a Tschamut. A caschun dils survetschs divins intonescha e conta ella cun vusch sonora e plein per-schuasiun las canzuns ed ils himnis ec-clesiastics.

Culs onns semuossan las fleivlezias ed ils sgurdins dalla vegliadetgna. Dunna Beer seretila dil menaschi dil hotel e surdat quel als vegnentsuenter. Bu-gen seseva ella denton in pèr urialas per di en cumpignia culs hospes. Ento-chen ella alta vegliadetgna haveva ella buna memoria ed in aparti dun d'enconuscher la glieud. Ella capeva da conversar cun giuven e vegli. Ina certa originalitat caracterisava la ho-teliera Emilia Beer cun sia dema-nonza curteseivla, mo era cun sia ferma voluntad enten defender sias ideas e sia perschuasiun.

In grond til da bara ha accumpignau la cara defuncta ils 26-12-1986 alla fossa sin santeri a Sedrun. Il chor mischedau da Sedrun ha priu cumiau dalla madretscha da sia bandiera cun em-bellir il survetsch divin e cun in davos salid alla premurada cantadura dil sanctuari a Tschamut. Cordial engraziamenti! Il Segner detti ad ella il rauas perpeten!